

## EXAMENS

## Passa 500 uffants han dumagnà examens d'admissiun a scolas medias

En il Grischun han 524 scolaras e scolaras dumagnà cun success ils examens d'admissiun per ina scola media, en las partiziuns gimnasi, scola media commerciala e scola media spezialisada, sco che l'Uffizi chantunal da furmaziun communitescha. Tut en tut han 838 scolaras e scolaras fatg examens il favrer ed il mars. L'onn passà eran quai anc stads 59 damain.

Per il gimnasi da lunga durada, pia quel da sis onns, èn 379 scolaras e scolaras da la 6avla classa primara s'annunziads – 221 han dumagnà l'examen. Quai è ina quota da 58,3%.

Per l'admissiun en la terza classa gimnasiala u en l'emprima classa da la scola media commerciala u spezialisada, han 459 uffants fatg l'examen unifitgà. 185, 40,3%, han dumagnà il pass en la terza classa dal gimnasi. 118, 25,7%, entschaivan l'atun la scola media commerciala u spezialisada.

## Examens finals

Da las 555 scolaras e scolaras ch'han fatg examens finals u matura en ina da las nov scolas medias grischunas han 539 gè success. (rtr/fmr)

## CORONAVIRUS

## Persunas sur 80 duain uss laschar far in segund booster

Persunas ch'èn pli veglias che 80 onns e persunas cun in sistem d'immunitad flavel duain far ina vaccinaziun da rinfrestgament questa stad.

Quai recumonda la Cumissiun federala per dumondas da vaccinaziuns. Cun ina vaccinaziun supplementara tar persunas spezialmain periclitadas pudess ins almain limitar il privel d'in grev decurs. Quai ha ditg ier a las medias *Christoph Berger*, schef da la Cumissiun per dumondas da vaccinaziun. Il dreg mument per il booster saja dentant fitg impurtant. Er il chantun Grischun sustegna la recumandaziun da la Confederaziun. L'atun duain lura tut las persunas sur 16 onns sa laschar vaccinar in'ulteriura giada, ha communitgà il BAG. Questa recumandaziun sa drizza cunzunt a persunas spezialmain periclitadas ed il personal da sanadad.

## Vaccinaziun per viadis

Persunas che vulan prolungar il certificat da Covid per ir sin viadi, possian dentant gia uss far sin agens custs ina segunda vaccinaziun da rinfrestgament, communitescha il chantun Grischun. In segund booster survegnan mo persunas a partir da 12 onns ch'han gè l'emprim booster avant passa 4 mais u il pli baud 4 emnas suenter in'infecziun. Ils custs muntan a 60 francs.

## Pagina d'infurmaziun dal Grischun

La vaccinaziun capita ordaifer la recumandaziun da la Cumissiun federala per vaccinaziuns. Vinavant gratuitas restan las emprimas duas dosas (immunisaziun da basa), l'emprim booster, vaccinaziuns per persunas cun grevas defizienzas d'immunitad ed il segund booster per persunas a partir dad 80 onns. (rtr/fmr)

## LA CIFRA DAL DI

# 22

## kilometers

aut è il pli aut culm dal sistem solar, l'Olympus Mons. Qua po il Mount Everest gist pachetar en! L'Olympus Mons sa chatta sin il Mars. (fmr/sb)

## PRESCRIPZIUNS DA CHATSCHA 2022

## Squitsch e restricziuns il medem mument

Il chantun Grischun adattescha sias prescripziuns da chatscha davent da l'atun proxim. Las novas prescripziuns prevedan dapli squitsch da chatscha sin la selvaschina d'ungla en tschertas regiuns dal Grischun. El medem mument datti – sco gia l'onn passà – restricziuns per la chatscha sin chamutschs e chavriels en Surselva.

MARTIN GABRIEL/FMR

I saja ina pulita sfida da resguardar tut ils bassegns ed interess en las prescripziuns da chatscha, ha *Adrian Arquint*, il schef da l'Uffizi chantunal da chatscha e pestga, ditg il mardi a la FMR. «D'ina vart vulain nus garantir ina chatscha grischuna attractiva che dat motivaziun a la chatschadra ed al chatschader. Da l'atra vart datti prescripziuns per cuntanscher finamiras. Igl è pelvair betg simpel da chattar qua in bun equiliber.» Tenor Adrian Arquint èsi dentant cler, che las chatschadras ed ils chatschaders stattan el center er tar las novas prescripziuns da chatscha. Chatschadras e chatschaders stoppian avair success cun la chatscha e pudair sajettar animals.

## 5430 tshiers sco directiva

Tenor las novas prescripziuns da chatscha ch'èn vegnidas publicadas il mardi sto vegnir sajettà en l'entir Grischun 5430 tshiers l'atun 2022. La populaziun da tshiers è dapi ses maximum l'onn 2019 vegnida reducida per 6% (960 tshiers). Il manader da l'Uffizi chantunal da chatscha e pestga, Adrian Arquint, discorra d'in act da ballantscha tranter reducziun da la selvaschina d'ungla e la protecziun dal gaud. Malgrà ch'i saja gartegia en las regiuns cun problems tranter gaud e selvaschina da reducir la populaziun da tshiers, stoppia l'effectiv tuttina vegnir reduci vinavant sin in aut nivel.

## La selvaschina guntgescha il luf

La preschientscha dal luf ha influenzà las novas prescripziuns da chatscha. Tenor Adrian Arquint guntgeschian ils tshiers il luf en territoris nua ch'il luf saja fitg preschent. «Il luf influenzescha fitg il cumportament da la selvaschina. En quellas regiuns ch'il luf è fitg preschent è la chatscha pli difficila. E per consequenza èsi er pli grev per nus da cuntanscher las finamiras.» Plinavant èsi tenor Arquint daventà pli cumplitgà da dumbrar ils effectivs da selvaschina pervia dal luf. «Ils problems areguard il luf en per franc anc pli gronds en l'agricultura che tar ils chatschaders. I constat dentant, ch'il luf ha in'influenza



Chatschadras e chatschaders ston uonn sajettar 5430 tshiers.

FOTO OLIVIA AEBLI-ITEM

«Nus na pudain betg influenzar las malsognas dals chamutschs, nus na pudain betg influenzar la populaziun dal luf e dal luf-tscherver e nus na pudain er betg influenzar envierns dirs.»

Adrian Arquint, manader da l'Uffizi chantunal da chatscha e pestga

za sin la chatscha, sin las dumbraziuns e sin la planisaziun.»

## Restricziuns tar chamutschs e chavriels en Surselva

Pervia da la situaziun gaud-selvaschina predominanta e pervia da las grondas populaziuns en tschertas regiuns ston en differentas regiuns da gaud er vegnir sajettads dapli chavriels e chamutschs. Tenor las novas prescripziuns da chatscha 2022 na vala quai dentant betg per la Surselva. Surtut pervia da malsognas e pervia da la preschientscha dal luf e dal luf-tscherver è l'effectiv da chamutschs e chavriels fitg pitschen. «Jau hai chapientscha per la situaziun da las chatschadras e dals chatschaders da chav-

riels e chamutschs da la Surselva. Nus avain qua ina situaziun fitg stentusa. Ma nus na pudain betg influenzar las malsognas dals chamutschs, nus na pudain betg influenzar la populaziun dal luf e dal luf-tscherver e nus na pudain er betg influenzar envierns dirs.» Per la chatscha da chamutschs e chavriels en Surselva na dettia dentant nagut auter che d'avair pazienza e sperar che la situaziun sa megliereschia. Actualmain vala ina reducziun dal temp da chatscha e la protecziun da la chaura da dus onns sur la lingia d'atezza. En il mender cas dovria quai l'onn proxim perfin anc dapli mesiras, ha Adrian Arquint ditg. Ma per 2022 restian las directivas per la chatscha da chamutschs e chavriels en Surselva las medemas sco l'onn passà.

## TIR

## Ruschein enstagl Castrisch

Per il final svizzer dal tir da gruppas èn sa qualifitgadas gist ogt gruppas grischunas. A Castrisch ha mancà in punct per la qualificaziun finala. Persuenter va la gruppa da Ruschein al final a Winterthur.

GION NUTEGN STGIER/FMR

Sajettà la terza e davosa runda nazionala tar il tir da gruppas han 15 gruppas dal Grischun. Da quellas han ogt gruppas tratg fitg ferm, uschè bain ch'ellas èn da la partida al final svizzer che ha lieu a l'entschatta da settember a Winterthur. Be il 1997 èn stadas cun diesch gruppas dapli gruppas en il final svizzer che actualmain. Il campinadi nazional da gruppas datti dapi il 1950 ed el è per tiradurs e tiraduras adina ina culminaziun da la stagiun da tir.

## Quatter gruppas dal champ D

Avant in onn avevan naginas gruppas grischunas cuntanschi il final nazional en il champ A, quel da l'arma da sport. Ussa han cun Favugn e Haldenstein duas gruppas fatg quel pass e vegnan ad ir al grond final en dus mais. En il champ D, quel da tut las armas d'ordonanza, èn sa qualifitgadas gist quatter gruppas da noss chantun. Il campin svizzer e grond favurit Rotenbrunnen/Giuvaulta, Bregaglia, Ruschein e Tumegl. La qualificaziun da la gruppa da Ru-

schein è segir ina surpraisa. Grazia a quella gruppa èn ils tiradurs sursilvans anc da la partida en la concorrenza. Per la gruppa da Castrisch, campionessa svizra 1997/2001 e bunamain mintg'onn en il final, èsi stà finì suenter la terza

runda nazionala en il champ D, arma da militar 90. Cun 689 puncts ha mancà a Castrisch in sulet punct per cuntanscher il final. Il final vegnan a sajettar en quel champ dal Grischun las gruppas da Samignun e Schiers/Aschera.



40 tiradurs grischuns èn da la partida en il final svizzer da gruppas.

FOTO GION NUTEGN STGIER